

1 TESARONIKA

Poru Gigirum Meuma Desiroma

Tesaronika Igiyawa Munan Tenewa

¹ ✧ Poru, Sairas ge Timoti gumbo, Tesaronika siosi me Mamunwa God ge Ayapan Iesu Keriso danave wakeyanawa yenan teete.

God ano oraiwa meuma ge yum ye guniyap.

Tesaronika Igiyawa Anotumat Muma Oya Gaun Veme

² Ye undag yenan nu evedni God gumbe gaun vete. Sira nun numa danave yenan anoete. ³ ✧ Nu evedni Mamunwa God namive yenan imug teg anoete. Nau yeuma anotumat gumbe, nau yeuma baigan gumbe sira ye Ayapan numa Iesu Keriso danave owanowan gumbe iyai wakeenewa.

⁴ Tatangwanen, God baigan yennewa. Nu anotu me wagomi yenne. ⁵ ✧ Kuiyawa gae oraiwa numa ye guniyap uwanewa, gae mekut onan, yusiwa ge Guwawa Iyakaisiyapama ge anotumat yusipam gaibu. Nu ye yapeyap yenan oya aninin wakeetewa ye anoene. ⁶ ✧ Danadawai kokavit auyana. Megara, ye Guwawa Iyakaisiyapama degadegaeba gumbe gae auyana, sira ye Ayapan ge nu minun ene. ⁷ At Masedonia ge Akaia apa anotumat igiyawa undag munan oya ye guwaguwawa oraiwa ayana. ⁸ Ayapan gaiyawa ye guniyap dauwag at Masedonia ge Akaia umne. Sira at Masedonia ge Akaia mukut onan, God gumbe anotumat yeuma at ampa ampa undag anoya. Meoya nu divi da anin den wata. ⁹ Iyayapan upeba umum veme, ye aninin nu aununiyana, sira ye aninin god ugaugaeba

✧ 1:1: Apa 17:1-9

✧ 1:3: 1Ko 13:13; 1Ko 1:4-6

✧ 1:5: 1Ko 2:4-5

✧ 1:6: Apa 17:5-9

yankweg tobiroriyag God wakeiviwa ge natawa ankwatave nau ene,¹⁰ sira ye aninin Usiwa kwimin apa ontanwa oya amarene. Me Iesu. God me boriruwawaya igiyawa gumbo warinamne sira inaine, me nu God danapiri meuma oniviwa gumbe waita numpe.

2

Poru Nau Meuma At Tesaronika Apa

¹ Tatangwanen ye yaug anoene, amdau numa ye guniyap me gwambe onan. ² ☆ Ye yaug anoene, namu danadawai koka ge ubmam at Piripi apa autu, megara God numa waita gumbe God gae oraiwa meuma danadawai kokawa danave ye guniyap yusipamit di watu. ³ Nu watuwa me anopipanum onan, me nu danunwa den esine gunup dauwag onnewa onan, sira me uga onan. ⁴ ☆ Nu God wat kiniya nunne gae oraiwa amaratan igiyaven atu. Meoya nu iyayapan gumbo den wag degai ata. God gumbe degai ata. God me danunwa yaimoyai yaupe. ⁵ Ye yaug anoene, nu gae ube den watu, nu ororog ag tamtan oya gae den watu. God me yaug anone. ⁶ Nu iyayapan gumbo waiya den autu, ye guniyap den autu, sira bira da gumbe den autu. ⁷ Nu Keriso apasoro meuma. Nu oma ane ye guniyap ibnawa yentu, megara den yentu. Nu ye yapeyap oravit atu, inawa me ud ususiwa amara munivi mina. ⁸ Nu baigan kokavit aiyentu. Meoya nu ye guniyap degadega gumbe keb atan anoete, God gae oraiwa meuma mekut onan, inaiinai numa gaibu. Kuyawa nu baigan numa ye guniyap. ⁹ ☆ Tatangwanen, nau yaigipam atan numawa ge mut yusipamit aigimtan numawa ye imug teg anoene. Nu bira da ibnawa wantanwa topai atu. Meoya nu

☆ 2:2: Apa 16:19-24; 17:1-9 ☆ 2:4: Gar 1:10 ☆ 2:9: Apa 20:34

aram ge kum nau ete, God gae oraiwa meuma ye guniyap opata watu.

¹⁰ Nu anotumat igiyawa yapeyap waketuwa, nu yaimoyai wakeete God namive, oraivit ge puiyu nuntan mina onan. Ye yangeyap yaununiyana, sira God yangave yaununne. ¹¹ ✧ Ye yaug anoene, Mamawa me usitainawa gumbo aiviwa mina nu ye desirom desirom guniyap atu. ¹² Nu wasiwam yenete, wat tuwanete, sira diruete. God toimuwawa ge eyawa danave unigtan oya yenan auwane. Ye inaiinai meib di wakeigimiya.

¹³ ✧ Meoya nu gaibu God gumbe gaun evedni vete. Ye God gae meuma nu gunup auyanawa, ye yaug anoyana, me iyayapan gae muma onan, me God gaiyawa. Me ye anotumat igiyawa daneyap nau aivi. ¹⁴ ✧ Tatangwanen, God siosi meuma at Judia apa Iesu Keriso danave wakeya. Ye God siosi meuma amave aisiene. Mu Ju igiyawa gumbo danadawai auya. Ebu desiroma meib ye gaibu iyayapan yeuma gumbo danadawai auyana. ¹⁵ ✧ Ju igiyawa mu Ayapan Iesu ge propeta guriya boriruwaya. Sira mu nu atatai inuniya dauwag antu. God mu gumbo degadega den ane, sira mu iyayapan undag gumbo anavi aya. ¹⁶ Nu Ju onan igiyawa matai waita autan oya gae vete, go Ju igiyawa mu tobot nuniya. Sira ebu meib mu evedni kukaeba muma noidauwag wakene. God danapiri meuma mu gumbo oieba gumbe uwane.

Poru Me Tesaronika Igiyawa Yawamtan Kokavit Anoivi

¹⁷ Tatangwanen, nu ye guniyap kum pipi at ubeube apa waketu.—Ginungunwa garayau den ete, go danunwa me desirom.—Nu yau yemtan kokavit opa di anoete. ¹⁸ Meoya nu imunup ye yavetan anoete. Ne Poru ongetan eni,

✧ 2:11: Apa 20:31 ✧ 2:13: 2Te 2:13 ✧ 2:14: Apa 17:5 ✧ 2:15: Apa 9:23,29; 13:45,50; 14:2,5,19

sira amdau duwameba ongetan eni. Go, Seitan tobot nunne. ¹⁹ ✧ Ayapan numa Iesu uwapewa, me namive bira nu owanowan numawa, degadega numawa, waiya waiya keret numawa ape? Me ye. ²⁰ Natawa di, ye me eyawa numawa ge degadega numawa.

3

¹ ✧ Meoya nu oma den ane nu unuwa nikiyag waketu, nu nukut at Asen apa waketu, ² ✧ Timoti barautu aine. Me nu tatan, sira God nauwawa aiviwa. Me Keriso gae oraiwa kep teg wateteyamivi. Me anotumat yeuma oya yusiwa yempe, sira ye ano yutuiwa yempe. ³ ✧ Kuyawa me danadawai kumiwa mame danave bira da danawa den ipunapun atan oya. Ye yembo yang anoyana nu danadawai mame autan oya gae namiven wait nunan wane. ⁴ Nu ye guniyap waketu kumiwa apa, nu diruientuwa matai danadawai auta. Natawa di, ye anoyana gare me matadne. ⁵ Kuyawa mameiba oya, nu oma den ane iyai waketu. Anotumat yeuma yang anotan oya me barauna aine. Yen an danadawai aueni. Ye amaorot aumuman, sira nau yaigipam numawa matai wakukampe onanapetan.

Timoti Umum Meumawa Me Poru Yusiwa Wanne

⁶ ✧ Megara Timoti ye guniyap on nu gunup gare mame di uwane. Me anotumat yeuma ge baigan yeuma oya umum oraiwa aug uwane. Me did nunne ye evedni nunan oraivit anoene. Sira, nu ye yau yentan kokavit anoete mina, ye gaibu yau nuntan kokavit anoene. ⁷ ✧ Meoya tatangwanen, nu danadawai ge edawai undag auete, go ye anotumat yeuma gumbe nu watmemeyam nuniyana. ⁸ Ye Ayapan gumbe kinkinkin yoigimiya ipewa, gare nu

✧ 2:19: Pir 2:15-16; 4:1; 2Te 1:4 ✧ 3:1: Apa 17:15 ✧ 3:2: Apa 16:1-3

✧ 3:3: 2Ti 3:12 ✧ 3:6: Apa 18:5 ✧ 3:7: 2Te 1:4

natawa gaibu wakeete. ⁹ Nu God numa namive yenan oya degadega ete. Degadega mame undag gumbe aninin God gaun wanton? ¹⁰ Nu imunup ye ginenamuiwa yaug, anotumat yeuma oya waita yenta, aram kum yusipamit nun yenan vete.

¹¹ ☆ Nu imunup Mamunwa God membovit ge Ayapan numa Iesu mu ebu watappeve nu yenan onanta. ¹² Nu imunup baigan guniyap ete mina, Ayapan ape ye yapeyap baigan yeuma sira iyayapan undag gumbo baigan yeuma koka ape noidauwape. ¹³ Sira nu imunup, Ayapan numa Iesu me iyakaisi igiyawa undag gaibu uwapewa, ye nonewa ano yusiwa yempe, Mamunwa God namive ye matai pui den yuyempe, ye iyakaisi a yempe.

4

Inaiinai Me God Watdegayatanwa

¹ Tatangwanen, oieba, nu Ayapan numa Iesu gumbe yusipamit yenan nun vete. Nu toyau yentu, God degadega atanwa oya ye aninin wakeigimiya. Natawa di, gare ye meis wakeigimiya. Meiba egave egave aigimiya. ² Ayapan Iesu gumbe nu gwangwan divi yentuwa yaug anoene.

³ ☆ God imive me ye iyakaisi aya. Ye uinantaraki a painau aisiya. ⁴ ☆ Ye desirom desirom kwapiwa inganit amaratan yaug anoya. Me iyakaisi ape amat yaiyai aigimiya. ⁵ Ju onan igiyawa mu God den yaug anoya. Mu uinantaraki eme mina ye den aya. ⁶ Mame oya, tateaiwa gumbo kukaeba den aya, sira ugauga den waya. Kuiyawa nu wait diruitu sira yusipamit naunewa yutu mina, Ayapan dividivi mame undag matai yusipamit kepte yempe. ⁷ ☆ God nunan auwanewa nu miyotapam atan oya onan,

☆ 3:11: 2Te 2:16-17 ☆ 4:3: 1Te 5:23; 1Pi 1:16 ☆ 4:4: 1Ko 6:13

☆ 4:7: Ibr 12:14; 1Pi 1:15-16

iyakaisi atan oya. ⁸ ☆ Meoya, mame waiviwa topai ayawa, me apan den topai ene, megara God me membo Guwawa Iyakaisiyapama yempewa topai ene.

⁹ ☆ Gare ye tateaiwa gumbo baigan garagara ene. Meoya me gumbe nu gigurum guniyap den teta. God toyau yenne ye desirom desirom guniyap baigan yeuma aya. Ye yembovit God gumbe toyau toyau auyana. ¹⁰ Sira natawa, ye at Masedonia undag danave baigan tateaiwa undag gumbo amunene. Nu yusipamit guniyap nun vete baigan egave egave amunigimiya.

¹¹ ☆ Nu ano yaigipamit diruitu, yai wakeigimiya. Nau yeuma tamutut aigimiya. Naniyap nau aigimiya. ¹² Meib aigimiya ipewa, ye iyayapan upeba painauwa ebu oraivit toyau muniya. Sira, ye nau oraivit aigimiyawa matai ye oma ape yembovit amaraya.

Ayapan Uwatanwa

¹³ Tatangwanen, nu yenan anoete ye iyayapan boriruwayawa munan anoya. Iyayapan upeba owanowan den emewa mu danadawai avieme. Go, ne imunap ye meib den aya. ¹⁴ ☆ Iesu botog sira inaine me nu anotumat ete, sira nu anotumat etewa Iesu oya boriruwayawa God Iesu gaibu tam ompe. ¹⁵ ☆ Ayapan gae meuma gumbe, nu ye guniyap mame diruita. Ayapan uwapewa nu ande vin wakeigimtawa, natawa di, iyayapan boriruwayawa namu yoipe, nu ivi yoita. ¹⁶ Noiwa wansin gaibu, aneya kokawa muma noiwa gaibu, God kae trampet meuma uigawa gaibu, Ayapan kwiminaw aig ompe. Sira Keriso gumbe boriruwayawa inaig namu yoipe. ¹⁷ Meve, nu ande vinag waketuwa wan mu gaibu yunat gwaveru danave toborata, sira piyu ge kwimin yapave Ayapan nun tosata.

☆ 4:8: Ruk 10:16; 2Ko 1:22 ☆ 4:9: Jon 13:34 ☆ 4:11: Epe 4:28

☆ 4:14: Rom 14:9; 1Ko 15:3-4,12 ☆ 4:15: 1Ko 15:51-52

Nu Ayapan gaibu yaibobot wakeigimta. ¹⁸ Meoya gae mame gumbé ye desirom desirom gara watmemeyam aigimiya.

5

¹ Tatangwanen, kum me aniyau nu gigirum yanén den teta, kuiyawa ye me yaug anoene. ² ✧ Ye yembovit yaug anoene Ayapan kumiwa arampuna ub abnawa mina uwape. ³ ✧ Iyayapan vemewa, “Yum ge at oraiwa,” amta onan wakukamtanwa uwape. Me vesin bug anewa dawai avivi mina, mu oma den ane ayun watpe.

⁴ Megara, tatangwanen, ye sisip danave den wakeyana. Meoya oiyat mame ub abnawa mina ye ape den teraya. ⁵ ✧ Ye undag eyawa usitainawa ge oiyat usitainawa. Nu aram ge sisip usitainawa onan. ⁶ Meoya, iyayapan up-eba mina den kubvinigimta. Nu numbovit yangunwa mereruwape numbovit amarata. ⁷ Bira bira kubvinemewa aram kubvinigimpe, sira bira bira yoi yaigipama nemewa aram yoi yaigipama naigimpe. ⁸ ✧ Nu oiyat igiyawa. Nu numbovit amarata. Anotumat ge baigan mut beyanawa togunup teta, sira nu owanowan waitawaita mut keretawa kuiyunup tonatta. ⁹ God imive mamaib nunan baraune. God danapiri meuma den auta, megara Ayapan numa Iesu Keriso gumbé waita auta. ¹⁰ ✧ Ayapan nunan boane. Me nu yangunwa mereruanewa ge kubvinetewa, Ayapan gaibu wakeigimtan oya. ¹¹ Meoya, gare ye ene mina, ano yusiwa yeuma garagara waita ag anoano yeuma garagara sig doriya.

Toyau Toyau Oieba

✧ 5:2: Mat 24:42-43; 2Pi 3:10; Rev 3:3 ✧ 5:3: Mat 24:39; Ruk 21:34-35

✧ 5:5: Rom 13:12 ✧ 5:8: Ais 59:17; Epe 6:14,17 ✧ 5:10: Rom 14:8-9;

1Te 4:14

¹² Tatangwanen, nu yenan nun vete. Ye yapeyap bira bira nau yaigipam emewa anog auya. Ayapan gumbe namuyoiyoi eme gae yusipam diruiemewa anog auya. ¹³ Nau muma oya baigan gumbe ayamat undag muniya. Ye desirom desirom guniyap yum danave wakeigimiya. ¹⁴ ☆Tatangwanen, nu toyau yenta mamaib aya. Ui irai irai igiyawa gae yusipam dirumiya, a emewa ano yusiwa muniya, yutu onanwa waita muniya, iyayapan undag gumbo yai wakeigimiya. ¹⁵ ☆Yaukapa. Bira da kukaeba gumbe wakepewa kukaeba garawa den ape. Megara ye yapeyap ge iyayapan undag gumbo evedni a ge yang oraivit aigimiya.

¹⁶ ☆Evedni evedni degadega aigimiya. ¹⁷ Nun waigimiya den kweigimiya. ¹⁸ ☆Dividivi undag gaun waigimiya. Kuiyawa mame God yenan anoivi Iesu Keriso gumbe.

¹⁹ ☆Guwawa iyameba den kweya boipe. ²⁰ God gaiyawa yai anog amaraya. ²¹ ☆Dividivi undag yangut yauya, sira oraivitwa kikikit yumnasiya. ²² Kukaeba gina ubeubewa undag kweg painau aisiya.

²³ ☆God yum tuiviwa, me membovit ye aiyempe di iyakaisi aya onanape. Ye guwewa ge nonemagewa ge kwapuiwa undag amara yempe. Ayapan numa Iesu Keriso uwapewa, ye pui den auya. ²⁴ Yenan auwanewa me ano amat oraiwa abnawa, meoya me oma ane yenan ape.

²⁵ ☆Tatangwanen, nunan nun waigimiya. ²⁶ Tateaiwa undag gumbo iyakaisi gumbe noi tog kaiwa kaiwa waya. ²⁷ Ayapan gumbe ne diruitna. Ggirum mame basiya, tateaiwa undag ano.

☆ 5:14: 2Te 3:6,11 ☆ 5:15: Rom 12:17; 1Pi 3:9 ☆ 5:16: Pir 4:4
 ☆ 5:18: Epe 5:20 ☆ 5:19: Epe 4:30 ☆ 5:21: 1Jn 4:1 ☆ 5:23: 2Te 3:3
 ☆ 5:25: 1Ko 4:3; 2Te 3:1

1 Tesaronika 5:28

9

1 Tesaronika 5:28

²⁸ Ayapan numa Iesu Keriso ano oraiwa ye guniyap wakeigimpe.

GAE MATAIWA

**The New Testament in the Maiwa language of Papua New Guinea
Nupela Testamen long tokples Maiwa long Niugini**

copyright © 2011 Wycliffe Bible Translators, Inc.

Language: Maiwa

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-30

PDF generated using Haiola and XeLaTeX on 8 Sep 2021 from source files dated 28 Aug 2021

45dcb14f-9541-5013-8907-63bcfabcd6b5